

EKALESIA FA'APOTOPOTOGA KERISIANO
I AMERIKA SAMOA

'AU LEOLEO

TUSI FAILOTU 2023

“TATALO I TAIMI E LE TAUGALEMU AI”



“PRAY IN TIMES OF UNCERTAINTY”

EKALESIA FA'APOTOPOTOGA KERISIANO I AMERIKA SAMOA

'AU LEOLEO

TUSI FAILOTU 2023

"TATALO I TAIMI E LE TAUGALEMU AI"



"PRAY IN TIMES OF UNCERTAINTY"

Laulau Mafutaga 'Au Leoleo EFKAS:

Kereti P. Faiiai FT, Peresetene
Mafutaga Fa'aleaoga FT, Failautusi
Tafailematagi Muasau FS, Teutupe

Saunia lenei Tusi Failotu:

Aufaigaluega Pulega Tafa o Kanana Fou

Tusi Seanoa FT
Eleasaro Fa'ataa FS
Paulo Lealaitafea FS
Geoffrey Tagaloa FS

UPU TOMUA

O Pa'ia ma mamalu o Samoa o le a le toe afea i se fa'amatalaga. Auā o Pa'ia ma mamalu mai a i le amataga, se'ia o'o i le gata'aga. A o le viiga ma le fa'afetai i le Atua, e tumau lea e o'o i le fa'avavau.

A e avea lenei avanoa e taumafai atu ai se fa'amatalaga i le pa'ia ma le mamalu o le Ekalesia. Ua fa'amalo le folau mai lena tausaga ua mavave atu. O lenei, ua tatou aulia manuia mai lenei tausaga fou i Lona Alofa ma Lona Agalelei. Ma, e ao ai ia i tatou ona fa'afoi le vi'iga ma le fa'afetai i le Atua e le aunoa.

O se tasi lenei o sauniga e ao lava i le Ekalesia ona fa'ataunuuina – le sauniga fa'ale-'Au Leoleo. O se sauniga tatou te lagona ai le pa'i mai o le Agaga o le Atua ma lona fa'amalosi mai. E fa'atonutonu ai lo tatou ola i mea e ao ona ta faia ina ia viia ai le Atua.

O le mea lea, a o tatou savalia i lenei tausaga fou, ia tatou to'a'aga e tatalo, ma tuuina atu o tatou agaga i le Atua, ina ia to mai ana fa'amanuiaga mo i tatou auā feau ma galuega o lenei tausaga. Ia fa'amanuia mai foi le Atua i galuega fa'ale-'Au Leoleo o lenei tausaga fou.

O le Susuga i le Toeaina ia Tusi Seanoa ma le 'aufaigaluega o le Pulega Tafa o Kanana Fou sa saunia le tusi taiala o lenei tausaga 2023.

Ia manuia tele mafutaga a le 'Au Leoleo i lenei tausaga i le fa'atasi mai o le Agaga Paia, Amene.


Kereti P. Faiai FT, Peresetene
Mafutaga 'Au Leoleo EFKAS

Januari 7, 2023

Tusi Faitau: Ioane 1:1-14

Matua: f.1 - *“Sa i le amataga le Upu, sa i le Atua le Upu, o le Atua foi le upu”*

AUTU: **“O LE UPU MA LE AMATAGA O LE TAUSAGA”**

A o lei amataina le tala a Ioane e tau fa’amatalalaina ai le galuega fa’aola a le Alii i le lalolagi, na mua’i fa’amanatu mai lava le tulaga o le Alii, e le gata i le feagai ai ma le Atua, le foafoaga, ae tainane lona feagai ai ma le tagata, lea na fai ma palealii o galuega foafoa a le Atua.

Ua tatou folau i lenei vaitau i se lalolagi ua anoanoa’i fa’afitauli ua puaoa ai la ta vaai i se lumanai manuia. E pei o le feagai ai o le lalolagi ma le taua i lukureni, ua aafia ai lona tamaoai, ma le toe fagua ai o feeseesea’iga i le va o atunuu komenisi ma malo sa’oloto. Lea foi ua laga ai ma manu’a o le lalolagi o ananafi, ma tau le mautinoa ai se ala i le lumana’i.

E taua ai le fa’amanatu muamua lenei a Ioane, fa’amautu muamua le fa’avae o le fa’atuatuaga e taoto iai le fa’amoemoe o le tagata, i le tulaga o lo tatou Alii. O ia e le gata sa iai i le amataga fa’atasi ma le Atua, a o ia foi o le Atua, ua liutino tagata (f.14) ma mau fa’atasi ma i tatou. O le taua o le soifua o le tagata i se lalolagi e ui ina tutupu ai fita ma taumate ai se lumanai manuia, ma le taua o le soifua i le mautinoa, na tuua ai e le Alii lona mamalu, ae afio mai ina ia mautu le fa’amoemoe o la ta fa’atuatuaga i le Atua e ana mea uma, o le mautinoa lena e le fesiligia, poo le a lava le ituaiga taimi ma le vaitau e soifua ai le tagata. O Iesu o le Upu a le Atua i vaitau le mautinoa o le ola.

Fesili e fa’atupu manatu i lau tatalo:

- O le a le uiga mo oe o le manatu lenei: O Iesu o le Upu a le Atua?
- O a ni suiga o lou ola o le a maua mai i le fa’atuatuaga?

Tatalo:

Le Alii e, foa’i mai upu i lo’u gutu, ou te iloa ai ona avatu ma fa’asoa atu fa’amanuiaga o lou alofa tunoa, ma lou alofa tele i lenei tausaga fou.

Januari 14

Tusi Faitau: Kolose 3:1-10

Matua: f.10 - *“Ia outou oofu i le tagata fou, o le ua fa’afouina i le iloa, e fa’atatau ia foliga i le na faia o ia.”*

AUTU: **“AMATAGA FOU”**

To’atele i tatou e maua ai le naunautaiga i se ola fou e soifua ma ola ai, poo se suiga fo’i e faia i lenei vaitau o le tausaga fou e pei ona o tatou iai. Tatou naunau ina ia faia se suiga, ma faia se amataga fou i se laasaga fou o le ola. Fou le tausaga, fou foi suiga e taulai iai le savaliga o le tausaga fou. O le vaitau lenei e masani ona tatou fa’alogologo ai i tautinoga a le toatele, o le sui i lenei tausaga, peita’i, e faigofie i le manatu iai, ae le faigofie lona fa’atinoina. O le agaga foi lea o loo ta’ua e le aposetolo i lana tusi ia Kolose, le tau o le toe susu’e o se laupepa

fou i le ola o le kerisiano mo Iesu. A ua aumaia foi e le aposetolo se tasi o manatu taua, e le mafai ona o tatou faia i so tatou lava malosi, poo le malosi o ni a ta tautinoga e tautino ai i luma o le Atua, fa'apea o tatou uso, se suiga e fa'ananau iai o tatou loto, seia vagana ua auai le mana o le Agaga o le Atua, e lagolago i le naunautauga o o tatou loto.

Fesili e fa'atupu manatu i lau tatalo:

- O a ni auala o loo e mafai ona matauina ai, ua mafai ona e vaaia le tino mai o sou naunau i ni suiga fou i lou ola?
- A o a foi mea o loo taofia mai ai oe mai le taliaina o le meaalofa o le ola fou mai le Atua i nei ona aso?

Tatalo:

Iesu e, ua ou lafoa'i fuafuataga o lou ola ua ou fa'ataoto, ina ia mulumulita'i i fuafuaga loloto ua e finagalo ai mo a'u. Foa'i mai mo a'u se amataga fou, ina ia loloto lo'u iloa o lau Afioga Paia.

Januari 21

Tusi Faitau: 1 Korinito 6:1-11

Matua: f.11 - *“Ua taelee outou, ua fa'apaiaina outou, ua ta'uamiotonuina outou i le suafa o le Alii o Iesu Keriso.*

AUTU: “FA'AMAMAINA”

Ina ua ma'ea ona fa'amalamalama e le aposetolo ia Korinito o le le usiuita'i i le Atua ua afua ai ona motusia le mafutaga ma Ia, ona ia fa'apea lea, *“a ua fa'amamaina, fa'apaiaina fa'a-amiotonuina i tatou e le Atua e ala i lona alo o le Alii o Iesu Keriso.”* O lea ua ta'uamiotonuina ai i tatou e le ona o sa tatou aga ua sa'o, ae afua i le alofa tunoa o le Atua.

Fesili e fa'atupu manatu i lau tatalo:

- Aisea e taua ai le fa'amamaina ma le fa'apaiaina o o ta tagata?
- O le a se uiga sa iai mo oe, poo loo ia te oe, ina ua tu'uina lou fa'atuatuaga ia te Ia?

Tatalo:

Lo'u Alii e Iesu, ua ou iloa ua ou agasala ia te oe. Ua ou iloa foi o le sala o la'u agasala o le vavaeseina lea mai lau Afio. Fa'afetai i lau fa'aolataga, ua le gata ua mafai ai, a ua fa'alatalataina atu ai a'u ia te oe e fa'avavau.

Januari 28

Tusi Faitau: Ioane 8:12-20

Matua: f.12 - *“O a'u nei o le malamalama o le lalolagi; o le mulilmuli mai ia te a'u, e le savali o ia i le pouliuli, a e ia te ia le malamalama o le ola.”*

AUTU: “POULIULI MA MALAMALAMA”

O le mea moni, e iai taimi i le soifuaga nei tatou te vaavaai ma iloa ai, e peisea'i ua na o le pouliuli ma le soifua faia'ina (*despair*) o loo ua siomiaina ai i tatou, ma ua foliga ua faigofie ona tatou pau'u atu ai i ia mea vaivai. A e peita'i, le Agaga o loo soifua i totonu ia i totonu ia i tatou le 'au fa'atuatua, o loo fa'amanatu mai pea ia i tatou o le Alii o Iesu na maliu ona o le soifua pogisa ma le puapuaga lena o le tagata. Ina ua afio mai o ia, o ia o le tagata soifua i lenei lalolagi, na ia aumaia le malamalama o le Atua ma fa'asususulu i le pogisa lena, ma fa'amalamalamaina ai.

Na tatou iloa lea tulaga i le fa'atalanoaga ma Nikotemo, le alii na alu ane ia Iesu i le pogisa, ae na fa'asusuluina iai le malamalama o le Alii ma suia ai lona tagata i lea malamalama. Na a'oa'o Iesu ia Nikotemo, "Auā ua fa'apea lava ona alofa mai le Atua i le lalolagi, ua ia aumai ai lona atalii e toatasi, ina ia le fano se tasi e fa'atuatua ia te ia, a ia maua e ia le ola e fa'avavau."

Fesili e fa'atupu manatu i lau tatalo:

- O anafea na fa'afouina ai le fa'amoemoe o lou ola, e ala i lou manatua e alofa le Atua ia te oe?
- E fa'apefea ona e fa'asoa le malamalama o Keriso i isi tagata?

Tatalo:

Fa'afetai le Atua i lou afio mai, ua e lavea'i mai ai a'u i le pogisa ma le ola toilalo i le agasala. Fesoasoani mai ia ou tumau ai i Lou Malamalama.

Fepuari 4, 2023

Tusi Faitau: Salamo 6:1-5

Matua: f.3 - "A o oe le Alii e, seia afea?"

AUTU: "TATALO UA LE TALIAINA"

O le mea moni, ua fa'aleoina e le faisalamo le agaga e masani ona o'o ia te i tatou pe a le taugalemū se folauga. E iai taimi ta te lailoa ai i le oi (f.6), ma lofia ai o ta moega i loimata. Taimi e fole ai o ta mata i le tiga (f.7). Ua tau le asa se po ta te fa'alogologo ai ma matamata i le TV i tala fa'atiga manava, lē maua se mapu, e fai o lena, a o o tatou fale faigaluega foi ia, ua siosioina i tatou i le tele o fa'afitauli eseese ua tau le nofo lelei ai la ta manava. Ona o ta alaga ai lea e pei ona alaga le faisalamo, "o afea ea le Alii e, o afea ea?"

E iai taimi e masani ona o ta o'o ai i lagona faia'ina na ma fa'apea ai, ai ua le manatu mai le Atua. Silafia lelei lava e Tavita o ta lagona ia, ma lena ua ia aumaia ai le fesili lena, "o afea ea?" Ae lagona e le Atua le tagi atu a Tavita (f.9), na fa'afofoga ai le Alii i le 'ai'oi atu lana auauna. E lagona e le Atua lou tagi atu, a tonu e le o nei, e le o taeao, ae o lana tuumumusu ia i ta'ua, fa'a-tuatua mai ia te a'u.

Fesili e fa'atupu manatu i lau tatalo:

- O a ni mafuaaga ua e lagona ai le vaivai, ma e tau manatunatu ma fesili ai o fea ea le Alii e?

- O a ni mea ua e silafia e fa'atuatuaina ai le Atua?

Tatalo:

Tama alofa e, ua mamafatu avega o lenei lalolagi, ma ua oo mai ai le fesili i lo'u loto, o afea ea? Fa'afetai mo le malosi e fa'atumauiina ai lo'u fa'atuatua.

Fepuari 11

Tusi Faitau: Fa'ataoto 3:21-26

Matua: f.24 – *“A e taoto e te le fefe; e te taoto lava, e malie foi au moe”*

AUTU: “MOE MALIE”

O le moe o se vaega taua i le soifua lelei ma le maloloina o le tagata. A e iai taimi e le mafai ona lelei ai se moe, ma le maua ai le malosi e tatau ma mafai ona oo iai le tagata. O taimi ia e masani ona o tatou popole ai i a tatou galuega ma fa'afitauli e masani ona tula'i mai ai, popole i o tatou tino ma ma'i e pu'eia ai, o fa'afitauli o a tatou mafutaga i totonu o aiga, Ekalesia ma falefaigaluega, o le tau fa'asoasoainao le tamaoaiga, ma le anoanoa'i o fa'a-fitauli e te'i ane lava ua ao, ae le lelei se moe ma maua se moe filemu.

Fautua mai le potu o Solomona, tatou te maua le moe lelei e manaomia e le tino, pe a tatou maua le atamai o le Atua, le mafaufau, ma lona potu; f.24, *“A e taoto e te le fefe; e te taoto lava, e malie fo'i au moe.”* E iai taimi tatou te moomia ai se pese filemu, poo se tatalo i le tulua o po, e fa'aosofia ai o tatou lagona i le Atua, e mapu ai le popole o o tatou loto.

Fesili e fa'atupu manatu i lau tatalo:

- E fa'apefea ona e maua le filemu i taimi e le lelei ai sau moe, ina ua e sulu-fa'i i le Atua?
- O le a sau pese, se tatalo, poo se fuaitau o le Tusi Paia, e fa'afaigofie ai ona ave lou mafaufau i le Atua?

Tatalo:

Le Atua, fa'afetai i lou alofa ia te a'u. Fesoasoani mai ina ia mafai ona tu'u lo'u mafaufau i lou alofa tunoa, ae le o mea e fa'apopoleina ai le ola.

Fepuari 18

Tusi Faitau: Eperu 6:9-12

Matua: f.10 - *“Auā e le amioletonu le Atua, na te le fa'agalagaloina la outou galuega ma le alofa ua outou fa'aali mai ai i lona suafa, auā na outou auauna i le 'au paia, i lē o loo outou auauna i ai.”*

AUTU: “E LE FA'AGALOINA”

Fa'amanatu mai e le tusi i le 'au Eperu i le Ekalesia, e le fa'agaloina e le Atua lo latou tautiga i galuega alofa i le suafa o le Alii o Iesu Keriso. E le tatau lava ona ta'umāmāina le amiotonu a le Atua mo ona tagata o loo tautuaina lona

finagalo. O lea foi ua aumaia ai ma le fa'amalosi i le f.12, "ia fa'aa'oa'o i e ua maua i le fa'atuatua ma le onosa'i i mea na folafolaina." O le fa'amalosi 'au ina ne'i mea ane ua manatu ua le amana'iaina e le 'au fa'atuatua lo latou tautiga, auā e lilo le vaai a le tagata, ae le lilo i le silafaga a le Atua.

Fesili e fa'atupu manatu i lau tatalo:

- O le a lau auunaga lena e fai mo lou Atua?
- Fa'amata o fa'amalosi 'au lou iloa e le o galo oe ia te ia?

Tatalo:

Le Atua alofa e, o la'u auunaga i lau afio ua faia ma le le atoatoa. Ae fa'afetai i le fa'atamaoigaina o a'u e tautua lou finagalo, ua a'oa'oina ai a'u e tautua mo isi ma le fa'amaoni.

Fepuari 25

Tusi Faitau: 1 Tesalonia 5:16-24

Matua: f.17 – "Ia tatalo e le aunoa"

AUTU: "FA'ALAGOLAGO I LE ATUA"

O le fa'amanatu lea a le aposetolo i le Ekalesia, f.17, ia tatalo e le aunoa, auā o loo taoto i le soifua fa'alagolago i le Atua le fa'amoemoe e tula'i iai le ola. O le mea moni, ua tele ma anoanoa'i fa'afitauli ua feagai nei ma le lalolagi: o fa'ama'i, o taua, le tau fa'amata'u o upu fai o malo i le vevesi ma le fevaevae'i. A o le naunauta'iga lava lea o le aposetolo, ina ia silafia e le Ekalesia, e tasi lava lona fa'amoemoe e fa'alagolago iai, ua na o le Atua.

O lea na fa'atonuina ai e le aposetolo le Ekalesia; f.16-18, "Ia saga olioli pea lava, tatalo e le aunoa, fa'afetai i mea uma lava, aua o le finagalo lea o le Atua ia te outou, ia Keriso Iesu." O le mea moni, a tatou fa'alagolago i le Atua i taimi uma ma soifua fa'alagolago i le tatalo e fa'afetaia ai lona alofa, tusa lava poo le a le tele o ni fa'afitauli e feagai ma i tatou. E silisili ese lo tatou Fa'aola, nai loo se isi lava mea e feagai ma o tatou tagata, o le a ia ta'ita'i tatou a o taula'i pea la tatou vaai ia te ia.

Fesili e fa'atupu manatu i lau tatalo:

- E fa'apefea ona avea lou soifua fa'atasi ma le Atua e maua ai lou malosii?
- O a ni auala o le a e fa'alagolago ai ia te la ?

Tatalo:

Le Atua mamana e, fesoasoani mai ina ia ou ola i taimi uma fa'atasi ma lau Afio i le aso nei, ma maua ai le malosii ua na o lau afio e maua ai.

Mati 4, 2023

Tusi Faitau: Isaia 61:1-6

Matua: f.1 – "Ua fa'auuina a'u e le Alii e tala'i le tala lelei"

AUTU: "O LE OLIOLI O LE TALA LELEI"

O le tausaga e 2009 e le fa'agaloina, auā o le tausaga lea na luluina ai laufanua o Tutuila ma Manu'a i se mafui'e tele, lea na afua ai le galulolo sa ufitia ai eleele o le tele o nuu. O lea aso sa tau fa'afesota'i solo aiga, ma tausaili a latou fanau ao'oga, fa'apea tagata faigaluega i lea aso. Ua pa solo tala, ma ua fa'asalalauina foi i upega tafailagi le mata'utia o le *tsunami*. Ae sa tele lava ina maua se to'afilemu ina ua fesoota'i ai ma mautinoa ai e matua o loo manuia a latou fanau, fa'apea foi ina nofolelei moa o nai tina nofo fale ina ua maua fesoota'iga ma o latou ta'ito'alua i falefaigaluega o loo manuia i latou.

Atonu e fa'apea se lagona na maua i le fa'alogo a Isaraelu ina ua alaga e Isaia le alofaina e le Atua o lona nuu. O se tala sa fa'ato'afilemuina le loto popole, ua tau le mautinoa ai se lumanai e taula'i iai le ola. A o taula'i le vaai a le nuu i eleele ua fa'aumatia ma fanua ua fāōa i le malosi, o se tala fiafia lenei e fa'atupu olioli i le loto e pei ona fai mai le perofeta i le f.1 ma le f.4, "*ua auina mai a'u e fusifusi i e loto momomo, ma atina'e foi mea na fa'atafunaina.*" O le leo o folafolaga a le Atua i lona nuu, o le tala lelei lea mo ona tagata. O le tala lelei lea ua o tatou maua mai ia Iesu Keriso, ua ia aumaia le fa'amoemoe o loo taula'i i folafolaga a le Atua.

Fesili e fa'atupu manatu i lau tatalo:

- O gafea o lou ola e te moomia ai le talalelei?
- Ua mafai ea e le talalelei a le Atua ona manumalo i lou fefe, mata'u ma le ola popole, ma suia ai i le olioli?

Tatalo:

Le Atua e, ua galala lo'u ola i lou talalelei. Ua siomia a'u i tala e fa'apopole ma tauf'amata'u i le ola i taimi uma. Ua ou fia fa'alogo i lou finagalo i nei mau mea e tula'i mai i le ola. To maia lou manuia, o le olioli e fa'avavau.

Mati 11

Tusi Faitau: Roma 8:26-30

Matua: f.26 – "*Tatou te le iloa mea tatou te ole atu ai ma le tusa, a e peitai o le Agaga, e fautua o ia mo i tatou i le oi e le mafai ona talatalaina.*"

AUTU: "NOATIA LAUFAIVA I TATALO"

Ua fa'ailoa e le aposetolo i le Ekalesia i Roma, le mea e ao ona fai, pe a le faigofie ona maua upu e faia ai tatalo, o le saili fesoasoani lea i le Agaga Paia. E fesoasoani le Agaga Paia i o tatou vaivaiga. E iai taimi tatou te oge upu e tatalo ai, ae (f.26) "*fautua o ia mo i tatou i le oi e le mafai ona talatalaina.*" A noatia o tatou laulaufaiva i tatalo, e fesoasoani le Agaga Paia e fa'atonutonu lo tatou fenunia'i, talatala o tatou tiga, ma momoli talotaloga o o tatou loto i le Atua. E fa'afofoga le Atua i a tatou tatalo, ma tali mai o ia e ala i lona fa'ama-talaloto ma fa'alolotoina ai lo tatou iloa o lona finagalo moni mo i tatou.

Fesili e fa'atupu manatu i lau tatalo:

- O a taimi e masani ona e oge upu ai, ma le iloa ai upu e te tatalo ai?

- E fa'apefea ona e iloa le fesoasoani mai o le Atua i ituaso fa'apea?

Tatalo:

Le Atua e, fa'afetai i lou Agaga Paia i lona fesoasoani ma lagolago mai taimi ua ou le iloa ai ona tatalo. A'oa'o mai, ina ia ou iloa ona tatalo.

Mati 18

Tusi Faitau: 1 Peteru5:1-10

Matua: f.7 - *“Ia tuuina atu ia te ia mea uma tou te popole ai, auā o loo manatu mai o ia ia te outou.”*

AUTU: **“O LE AGAGA MONI O TATALO”**

“E tele taimi na ou alu ifo ai i o’u tulivae ona ua ou mautinoa, ua leai lava se isi mea ou te mafaia. Ua iso lo’u atamai, ma ua gaogaoii lo’u tagata i aso leaga ia.” O upu ia a le Peresetene o Linikone, i le vaitau pogisa o le malo Meleke. Vaitau o le vatau ma le fevaevaea’i o le malo, ma ua vaevaeina foi i le fa’ailoga lanu ma le fa’ailoga tagata. E iai taimi e oo ai lagona ia i o tatou tagata, lagona e lu’itauina ai o tatou tagata ma manino ai lo tatou vaivai, i le manaomia o lo tatou fa’alagolago i lo tatou Alii, e leai se gataaga o lona malosi ma lona atamai. O le alofa o le Atua i ona tagata, fa’atasi ai ma le fa’avavau o lona malosi, ua matua manino ai, ua na o ia lava tatou te (f.7) *“tuuina iai mea uma tatou te popole ai.”*

Fesili e fa’atupu manatu i lau tatalo:

- O a taimi e masani ona iloa ai ou vaivaiga?
- Fa’apefea ona e tali atu i ai i ia taimi pe a oo mai?

Tatalo:

Le Atua fa’avavau e, ua ou iloa a aunoa ma lau afio e leai se mea ou te mafaia. Fa’afetai i le avea o lau afio ma fesoasoani sili i taimi uma e mo’omia ai.

Mati 25

Tusi Faitau: 1 Korinito 15:42-44

Matua: f.42 - *“E luluina ma le pala, e toe fa’atuina mai ma le lē pala”*

AUTU: **“FA’ATUINA E SIVA”**

I a’oa’oga a Paulo e uiga i le toetu, na ia fa’atusaina ai o tatou tino i le fatu la’au, e totoina ma pala ai ina ia tatupu ai le moemoe o le ola fou. E ui lava ina fa’avaivaia o tatou tino i gasegase ma vaivaiga e tele o le tino, e toe tutu mai lava tino o le ‘au fa’atuatua (f.42-44), *“I tino e le pala, matagofie ma le malosi”.*

Fesili e fa’atupu manatu i lau tatalo:

- O a ni mea o loo e mo’omo’o iai e te faia pe a uma le toetu?
- E fa’apefea ona e maua ai iina se fa’amoemoe e tala’i iai lou ola?

Tatalo:

Ia viia oe lou Alii e Iesu, auā e leai se mea leiloa, a ua na’o mea e maua i le lumana’i.

Aperila 1, 2023 (Aso Sa Laupama)

Tusi Faitau: Mataio 21:5

Matua: f.5 - *“O loo afio mai ia te oe lou tupu, o loo ti’eti’e i le asini”*

AUTU: **“O LE TUPU I LUGA O LE ASINI”**

O le aso Sa lenei ua fa’amanatuina ai le afio a’e o Iesu i Ierusalem. Fai mai na ti’eti’e o ia i le asini a o agai atu i le aai. O le fesili ua tula’i mai, aisea ua finagalo ai le Alii e malaga i Ierusalem i luga o le asini? O lona ti’eti’e i le asini, o le a vaavaai ai ma iloa o ia e le to’atele o tagata, a o le tele lava o taimi sa lei finagalo o ia e iloa o ia e se tasi. Fai mai le tusi a Mataio (f.4-5), *“ina ia taunuu ai le upu a le perofeta, ua fa’apea mai, Ia outou fai atu i le tama fafine a Siona, fa’auta, o loo afio mai ia te oe lou tupu, ua agamalu o ia, o loo ti’eti’e i le asini, o le tama’i asini foi.* E masani tupu e faia malaga fa’atupu i luga o solofanua, ae ina ia fa’ailoa le uiga ese o lona tulai mai o le ta’ita’i ia Siona, o le ta’ita’i e loto maualalo ma agamalu, na te aumai le filemu ae le o taua.

Fesili e fa’atupu manatu i lau tatalo:

- O le a le ituaiga tupu lea e iai Iesu ia te oe i ona po nei, i o tatou foi taimi?
- E fa’apefea ona e fa’ailoa lou agaga fa’aaloalo ia te ia o lou tupu?

Tatalo:

Fa’afetai Iesu i lau malaga fa’atupu i Ierusalem. Fa’atamaoiga a’u i lou filemu, ina ia mafai ona avea lo’u fa’atauva’a ma ala o lou filemu.

Aperila 8 (Aso Sa Eseta)

Tusi Faitau: 1 Korinito 15:20-28

Matua: f.20 - *“Ua toe fa’atuina mai Keriso i e ua oti, ua avea ma fa’apolopolo o e ua momoe.”*

AUTU: **“O LE TOETU UA SUIA AI MEA UMA”**

Taofi le aposetolo o Paulo, (f.14) *“afai ua le toe fa’atuina mai Keriso, po ua fa’aleaoga la matou tala’i, ua fa’aleaoga foi lo outou fa’atuatua.”* O le tautinoga lea o le fa’atuatua o le aposetolo i le toetu, ua fa’aatoatoaina ai le maualuga o le galuega lavea’i a le Atua i ona tagata. O la Paulo, o le folafolaga o le toetu, e le na o le toetu o le Alii e fa’atatau iai, ae fa’atatau foi iai latou uma o e na maliliu i le suafa o le Atua ma lona finagalo. Taofi le aposetolo (f.20) *“ua toe fa’atuina mai Keriso i e ua oti, ua avea ma fa’apolopolo o e ua momoe. O le ala lea ua suia ai mea uma, aua ua toe soifua manumalo le Alii.”*

Fesili e fa’atupu manatu i lau tatalo:

- O e lagona le mana o le toetu o le Alii i lou ola i aso uma?

- O a ni fa'afatiatama'i o lou ola o loo fai ma pa pupuni o le toetu o le Alii?

Tatalo:

Fa'afetai Iesu i le mana o lou toetu ua toilalo ai le agasala i lo matou ola.

Aperila 15

Tusi Faitau: Auega 3:22-26

Matua: f.22 - *“O le alofa o le Alii ua le fa'aumatia ai o tatou, ona ua le mavae lona alofa mutimuti vale.”*

AUTU: **“O LE ALOFA TELE O LE ATUA”**

E silafia e le Alii a tatou auega ona o manu'a o a tatou agasala i le tuana'i. A ua ia fa'atamaoaiga i tatou ina ia o tatou manumalo i lo tatou fa'avaivai, ma liliu mai i a tatou agasala, ma ola i le fa'amoemoe i lona alofa tele, ma lona fa'amaoni. Ua a'oa'o mai mo i tatou ana afioga;(f.24-26) *“O lo'u tofi o le Alii lea, o le mea lea ou te fa'amoemoe ai ia te ia.”*

Fesili e fa'atupu manatu i lau tatalo:

- O a taimi e te lagona ai le fa'avaivai ona o agasala o le tuana'i?
- O fa'apefea ona fesoasoani le Atua ia te o ina ia e maua le filemu i le fa'amoemoe i lona alofa tele mo oe?

Tatalo:

Le Atua alofa mutimutivale e, fesoasoani mai ina ia ou lafoa'i i lau Afio le fa'amoemoe e mautinoa i lou alofa, a o o'u tala'i le talalelei o lou alofa e fa'avavau i mea uma ou te alu iai.

Aperila 22

Tusi Faitau: Salamo 103:14

Matua: f.14 - *“Ua silafia e ia, o le efuefu lava i tatou”*

AUTU: **“LAGONA LE ELELEA”**

O le mea moni, a o fa'agasolo pea lo tatou ola ai i totonu o le galuega, i le tele o fa'afitauli e feagai ma i tatou i lea taimi ma lea taimi, ae tainane ai o le vaitau lava ma ona fa'afitauli e tu'ipalaina ai pea le soifua o le 'au faigaluega. Tuu ane i tausaga o le soifuaga, ua tele ma'I eseese ua aafia ai le ola, ma afaina ai le soifua maloloina. E iai taimi tatou te lagona ai, ua le toe tutusa le malosi ua iai, mai i le taimi sa tauamatamata ai. Ona moni ai lea o upu a le faisalamo, o ta'ua *“o le efuefu lava i ta'ua.”* O le mafuaaga lea na aiaina ai loa e le Atua lo ta ola, ma auina mai lona alo e lavea'i le vaivai lea o o tatou tagata, ma toe fa'afouina ai i lona mana.

Ua fa'amanatu mai Tavita, silafia lelei e le Atua le foafoaina o o tatou tagata, foafoa mai i le efuefu e pei ona molimauiina e Kenese (Ken.2:7). Silafia foi e le Atua le ituaiga lalolagi lea ua iai lo ta lalolagi ina ua aafia i le agasala. O le alofa la o le Atua lea na ala ai ona afio mai lona alo e to'atasi ina ia maua e lo ta vaivai

le ola fa'amagaloina. Poo a lava fita o le ola ma ona lu'itau, tatou te to'a lava i le fa'amoemoe i lona alofa tunoa.

Fesili e fa'atupu manatu i lau tatalo:

- O a mea na tutupu i lou ola ua e iloa ai, o lo ta ola e iai ona tuaoi?
- E fa'apefea ona e lagona le pa'i mai o le agalelei o le Atua ia te oe i ia taimi?

Tatalo:

Tama alofa e, ua ou iloa o'u vaivaiga, ma lou finagalo mo a'u, fesoasoani mai ina ia ou maua le malosi e fa'atuatua ai ma fa'amoemoe i lau afio.

Aperila 29

Tusi Faitau: Kenese 1:1-5

Matua: f.3 - *“Ua fetalai mai le Atua, Ia malamalama, ona malamalama ai lea”*

AUTU: “IA MALAMALAMA”

O le malamalama, o le ulua'i galuega lea o le foafoaga a le Atua. O le galuega na faia ona o le tulaga o loo taoto ai le lalolagi, *“Sa soona nunumi, gaogao ma ufitia foi i le pouliuli.”* A o le malamalama na afua i le malelega a le Atua. O lana malelega foi lea, poo lana upu, lea e molimau ai le faisalamo, *“e fa'amalamalamaina ai, fa'alotomatalaina ai”* (Sal.119:30). A o lea na fetalai manino ai le Alii, *“O a'u nei o le malamalama o le lalolagi”* (Ioane 8:12).

O lona uiga, o le uluai fetalai lava a lo tatou Atua o le malamalama, e le ona o le moomia e le Atua o le malamalama e galueina ai le foafoaga, a o le malamalama na faia mo tatou. O le malamalama e mafai ona o tatou iloa atu ai le Atua, ma ana galuega i le lalolagi, lea na ia valaauina iai i ta'ua.

Fesili e fa'atupu manatu i lau tatalo:

- O a vaega o lou ola o loo sili ona e manaomia ai le malamalama o le Atua?
- Na fa'apefea ona fesoasoani le malamalama lea o le Atua ia te oe i le tuana'i?

Tatalo:

Fa'afetai Iesu i le avea o lau afio ma malamalama o le ola, e fa'amalamalamaina ai o matou ala i aso uma.

Me 6, 2023

Tusi Faitau: Salamo 111:1-5

Matua: f.2 - *“O mea ua faia e le Alii, o mea tetele lava ia, o loo sailia e i latou uma lava o e fiafia i ai”*

AUTU: “E SILISILI ESE LO TATOU ATUA”

Fa'amanatu e Tavita i lana pese, o le tagata na faia e le Atua i lona mata'utia ma lona mata'isau. O le mea lea e ao ona vivii ma fa'afetaia o Ia. Le agaga lea o loo maua i upu o le matua e pei ona pese ai le faisalamo: o galuega tetele a le Atua, e fiafia iai i latou e fiafia i le Alii. O le mea lea e le tatau ai lava ona

mapu o tatou laulaufaiva e vivii ma pepese fiafia i lo tatou Atua. O mea tetele ua fai e le Atua, o mea lelei ia, e sailia e i latou uma o e e fiafia i le Alii.

Fesili e fa'atupu manatu i lau tatalo:

- O a ni mea o i le foafoaga o loo e maofa ai?
- E fa'aapefa ona fa'aavanoaina lou taimi e te fa'afetaia ai le Atua i ia mea?

Tatalo:

Ava le Tama e, e tele lava taimi ua ou ave ai le fa'amuumua i le matagofie ma uiga ese o le foafoaga, ae galo ai lau afio o le e ana ia mea uma. Fesoasoani ia avea le foafoaga ma ala e manino ai le vaai i lau afio ma lou matagofie

Me 13

Tusi Faitau: Kolose 1:17

Matua: f.17 - “O ia foi o le ulua'i o mea uma lava ia te ia”

AUTU: “LALOLAGI UA MAMANUINA”

I le vaitausaga o le 1980, na molimau ai se tasi o alii vaai i fetu ma si'o-si'omaga o le vanimonimo e fa'aapea, o foliga o mea ua vaaia i lenei lalolagi, o loo atagia mai ai le iai o se malosi na fuafua lelei ma fa'ataoto le lalolagi i lona taotoga ua iai. E o gatasi lea ma le molimau a se tasi foi alii atamai i le 3,000 tausaga talu ai, na ia molimau ai e fa'aapea: “a ou vaai atu i lou lagi, o galuega a ou tamatamai lima, o le masina atoa ma fetu na e faia, se a ea le tagata e te manatu mau ai ia te ia?” (Sal.8:3&4) E alofa le Atua i o tatou tagata, o le ata manino lea o loo ua mamamu ai le lalolagi na saunia e ala i lona alo pele e to'atasi, e pei ona molimau le apusetolo, “o le ulua'i o mea uma lava.”

Fesili e fa'atupu manatu i lau tatalo:

- O a ni auala o loo e iloa ai le Atua i vaega ta'itasi o lou soifuaga?
- O a ni ala o loo e fa'asoaina ai lea mautinoa o le Atua i lou uso ua fesiligia o ia?

Tatalo:

Fa'afetai le Alii, ona o loo molimauina pea lau afio i le lalolagi na e foafoaina. Tatalo mo i latou o loo ua pogisa i lea mea, ina ia e avatu i latou fa'atasi ma le 'au fa'atuatua i lau afio.

Me 20

Tusi Faitau: Kenese 1:26-28

Matua: f.27 - “Ona faia lea e le Atua o le tagata i lona fa'atusa.”

AUTU: “O SE MEA LOLOTO UA FUSIA AI TATOU”

E tele mea tatou te feeseesea'i ai, e le gata i mataupu fa'a-polokiki, o tapua'iga, o nuu ma aiga, ma le tele lava o isi mea. A o le mea moni e le mafai

ona tineia, o loo iai lava mea e loloto o lo tatou ola o loo ua fusia fa'atasi ai i tatou uma. O i tatou uma lava na faia e le Atua, ma fusia fa'atasi i le aiga e tasi. Poo le a lava le eseesea ua vaaia iai tatou, "o i tatou uma lava na faia i le fa'atusa o le Atua." Ae le gata i lea, e iai lona fa'amoemoe na tuu ai i ta'ua i le fa'atoaga (Ken.2:8) "ona ia tuuina lea i lea mea o le tagata na na faia. Ina ia (f.15) galue ai ma leoleo ai." Tauga le manatua pea, o i tatou lava o le fanau e tasi a le Atua, fusia i lona finagalo e ao ona o tatou fa'atinoina.

Fesili e fa'atupu manatu i lau tatalo:

- O ai nisi e foliga ua matua eseese lava ma oe i lau vaai?
- Fa'amata o le a se mea e tula'i mai pe a e fa'asoa ma ia tagata i mea ua o tatou tutusa ai?

Tatalo:

Le Atua e, i le fa'agasologa o loo ua molimauina i le lalolagi i lenei vaitau, ua pogisa le vaai a tagata i le moni o le mau: o lau afio, o loo ua ogatotonu i mea uma ua tutusa ai i matou lau fanau. Tatalo ina ia mafai ona o matou manino i le fa'amaoni o le mau.

Me 27

Tusi Faitau: Iosua 9:9-15

Matua: f.14 - "Ona tago lea o ia tagata i a latou mea e 'ai, a ua latou le fesili atu i le afioga a le Alii."

AUTU: "IA FA'ATELETELEGESE, AE FAI SE TATALO"

O le tala e pei ona ta'ua i luga, o le tala i le feagaiga na osia e Isaraelu ma sa Hivi. Na fesiligia e Iosua poo ai i latou, ae poo fea foi e o mai ai, a ua latou tali mai, o i latou e o mai i le nuu mamao, ma ua o latou fa'amaonia lea tala i a latou areto magumagu ona o le mamao o le mea na asa mai ai. Ona aai ai lea o Isaraelu i areto, a ua le fesili muamua i le Atua. O le mafuaaga lea na osia ai le feagaiga i le va o sa Hivi ma Isaraelu, ma ofi ai i totonu o le nuu. Ua le taofiofi Isaraelu ma fesili i le Atua le na folafola o le a fai le nuu o Kanana ma o latou tofi. O le faiamanatu taua lea o lenei tala, e taua le fa'ateletelegese, ae sei fesiligia le Atua. Taua le tatalo, ona fa'ataunuu lea o se fa'amoemoe ua saunia iai.

Fesili e fa'atupu manatu i lau tatalo:

- O a ni fa'aiuga ua e tele'a'i e fai e aunoa ma lou talanoa muamua i le Atua ma fesiligia sona finagalo?
- O a ni mataupu o loo moomia ina e talanoa ai ia te ia i lenei aso?

Tatalo:

Fa'afetai Tama i le atamai ua e foa'ifuaina mai, i lou alofa tunoa, ua e le silasila ai i le fa'aletonu o lau fanau o loo ua valaau atu i lau afio. Fesoasoani mai ina ia ou tatalo muamua, a o lei fa'atinoina se fa'amoemoe.

Iuni 3, 2023

Tusi Faitau: 1 Ioane 5:13-15

Matua: f.14 - *“O lenei foi le loto tele ua tatou maua i ona luma, pe afai tatou te ole atu ai se mea e tusa ma lona finagalo, e fa’afofoga mai o ia ia te i tatou.”*

AUTU: “MAUTINOVA I LE ATUA”

Ua ia i tatou puna’oa o le ola, o loo i lo tatou Alii fa’aola o Iesu Keriso. O le alofa tino o le Atua i lana fanau, na ia auina mai ai lona alo ina ia tali o tatou manaoga uma. E pei ona tautino Ioane, *“afai tatou te ole atu i soo se mea e tusa ai ma lona finagalo, e fa’afofoga mai o ia ia te i tatou.”* Afai tatou te faitau i le Tusi Paia, ma teu i le agaga lana Afioaga, tatou te mautinova i a tatou tatalo e tali mai o ia i o tatou manaoga. O lona finagalo, ia maua e lana fanau le filemu, poto, ma le fa’atuatua, o ia mea uma o le a ia foa’i mai. (f.15)

E i ai taimi i le ola nei e foliga ua le tali mai le Atua i a tatou tatalo, ma ua o tatou le maua ni suiga lelei. Ae a tatou tumau pea i lo tatou mautinova ia te ia, o le a fa’atupuina ma malosi ai lo tatou ola mautinova i le Atua ma lona tali mai. O le tumau i le mautinova lena, ma fa’amoemoe pea i le Atua e le aunoa, o le a fa’apena ona fa’atupuina ai lo tatou mautinova i le Atua (Sal.116:2). O le a mafai e lena mautinova ona fa’atupuina lo tatou ola fa’atuatua i ana folafolaga i ona lava taimi.

Fesili e fa’atupu manatu i lau tatalo:

- O le a se taimi na vaivai ai lou alu i le Atua i le tatalo?
- E fa’apefea ona e maua le mautinova, ma ave uma lou agaga i lau tatalo?

Tatalo:

Le Atua lo matou tama o i le lagi, fa’afetai i lou alofa mutimutivale, ua mafai ai ona ou maua le mautinova e alu atu ai i ou luma i le tatalo, ma ou maua mai ai i lau afio fa’amanuiga moomia o le ola.

Iuni 10

Tusi Faitau: Esoto 12:24-28

Matua: f.27 - *“O le taulaga o le paseka lenei i le Alii, o le na sosopo ane i fale o le*

fanaua a Isaraelu i Aikupito, ua fa’asao mai e ia i o tatou aiga.”

AUTU: “UA GAOIOI LE ATUA”

O le tali ane o le Atua i le felafolafaiga a Mose ma le tupu o Farao, lea na fasia ai ulumatua uma a Aikupito, ae laveaina mai ai ulumatua a Isaraelu. O le mafuaaga lea o le Paseka e pei ona ta’ua i luga. O se fefinauaiga ma fefa-loa’i ai Mose ma le tupu o Farao, lea na afua ai lona tali ane. O le tagitu’i o le nuu, na lagona e le Atua mai i le lagi, na ia afio ane ai, ma tuusaolotoina ona tagata. O le mafuaaga lena o le fa’amanatuina pea e Isaraelu o le Paseka, poo le sosopo ane o le Atua i fale o Isarael, ma laveaina ai.

I le feagaiga fou, ua avea le maliu o Iesu Keriso e fai ma paseka o le ola fou mai I le Atua. O le toto o le tama'i mamoe na sausuaina ai fale o Isaraelu, lea na sosopo ane ai le Atua ma fa'aolaina ai le nuu o Isaraelu nai le mala tele na fa'aumatia ai ulumatua uma a Aikupito. O le tamai mamoe lena o le alo o le Atua, ma lona toto ua fa'aolaina ai le lalolagi uma.

Fesili e fa'atupu manatu i lau tatalo:

- E fa'apefea ona fa'amanatuina lenei mea sili ua faia e le Atua mo i tatou?
- Na fa'apefea ona e fa'asoa atu le fa'amoemoe lea i isi tagata?

Tatalo:

Fa'afetai Tama i au galuega ofoofogia. Foa'i mai le malosi matou te manino ai i au galuega uma, ma fa'atupuina ai pea le fa'amoemoe e fa'aauau ai.

Iuni 17

Tusi Faitau: Salamo 68:4-6

Matua: f.5 - "O le Tama ia o e matua oti"

AUTU: "UA LE TOE MATUA OTI"

O le mea ua mautinoa e le o se mea lelei se tama poo se teine e soifua ane i totonu o se aiga e aunoa ma ni matua. O le aunoa ma se tama o le a ia le maua ai le malosi e masani ona fa'asoa e le tama. Le malosi e faia ai fa'aiuga i mea faigata e feagai ai i le ola nei. A o le soifua e aunoa ma se tina, o le a le maua le mafanafana o le alofa fa'a-tina e atina'e ai lona ola. A o lea ua moli-mau le faisalamo, o le Alii le Atua o le tama o e ua matua oti. O le tama e to'a iai tagata uma ua lagona le tu'ulafoaina, le popole ma le atuatuva'e ona ua leai ni matua e fa'amautu iai le ola. Ua folafola le Atua o le a avea o ia ma "tama o e ua matua oti." Poo a lava faigata ma fa'afitauli e feagai ma le tagata, e to'a lava lona ola i le Atua.

Fesili e fa'atupu manatu i lau tatalo:

- O le a se taua ia te oe o lou silafia o loo iai lou tama i le lagi e alofa fa'amaoni ia te oe, ma na te le tu'ulafoaina oe?
- Fa'apefea ona ia tali ou manaoga loloto?

Tatalo:

Le Atua e, fa'afetai ua ou maua i lau afio se tama e to'a iai le ola i mea uma. Silasila alofa maia i fanau a tagata, ua galala i le fa'amaoni o le alofa e moni.

Iuni 24

Tusi Faitau: Roma 13:8-10

Matua: f.8 - "Aua ne'i ia te outou se mea e tasi a se tasi tagata, a e tau lava o le fealofani"

AUTU: "SAVAVALI FA'ATASI MA ISI"

O le savavali fa'atasi, o se tasi lea o fe'au fa'ale-talalelei taua a le aposetolo o Paulo, e pei ona ia augani atu ai i le Ekalesia i Roma. O le savavali fa'atasi e mafai i le alofa, e pei ona ia fai mai ai, "*tau lava o le fealofani.*" O le fealofani o le alofa o le tasi i le isi. O le alofa e lagona ai le olioli i lou uso, ma fa'apena foi i le uso. A fialia, ua fialia fa'atasi; a fa'anoanoa fo'i, ua lagona fa'atasi le fa'anoanoa. O le manatu o le aposetolo, a feagai lou uso ma fita o le ola, poo ni fa'afitauli fo'i ua pona'ia ai le ola, e le o le mea sili lou taumafai e fa'asoa se tali o ia fa'afitauli i lou uso. Ae taua le savavali fa'atasi i le alofa ma lou uso. Soosoo tau'au fa'atasi ma felagolagoma'i le tasi i le isi, o lea mea sili lea ona lelei.

Fesili e fa'atupu manatu i lau tatalo:

- O ai se ua moomia le savavali fa'atasi ma oe i lenei vaiaso?
- O a ni auala ua finagalo ai le Atua e te fa'atinoina ai lea mea?

Tatalo:

Le Alii e, tatala la'u vaai ina ia ou iloa ai manaoga o tagata i o'u tafatafa. Fesoasoa ni mai ina ia avea a'u ma se uo e alofa moni.

Iulai 1, 2023

Tusi Faitau: Mataio 26:36-46

Matua: f.36 - "Ia outou nonofo iinei, se'ia ou alu atu iila ou te tatalo"

AUTU: "SE TAIMI FILEMU MA LE ATUA"

Tatalo Fa'afetai:

- I le Atua e fesoota'i mai pe mafuta ma i tatou, e ui ina o tatou le mafuta atu i le tele o taimi
- I le Agaga o le Atua, e tuu mumusu ma fa'amanatu mai pea, ia iai lava se mafutaga ma le Atua i le mea lilo e malosi ai
- I le Ekalesia, i le soifua tatalo, e toesea ai i le mea tu'ufua e tatalo mo le manuia o ona tagata.

Tatalo Fa'atoesega:

- Fa'atoese i le Atua ina ua tatou fialia i talotaloga e faia i nofoaga lautele, ae leai se mafutaga tatalo fa'apitoa a le tagata lava ma le Atua
- Fa'atoese i lo tatou fa'atūtūgātā ma augatatā, e o i le fale tatalo o le Atua e saili ai le manuia mo le ekalesia ma ona tagata aemaise o tatou aiga
- Fa'atoese i lo tatou fialia pea e nonofo i o tatou nofoaga filemu, a ua le saili i le mea tuufua e lagona ai le filemu loloto i le Atua

Tatalo Mana'oga:

- Tatou ole i le Atua mo le filemu o le atunuu ma ona tagata, aemaise le ekalesia ma aiga ma ona tagata, a ia amata ia te a'u
- Ole atu i le Atua ina ia fialia lana ekalesia e o a'e i le fale o le Atua, o mea tuufua e saili ai le manuia mo i tatou uma

- Talosia le Ekalesia, le atunuu ma ona tagata, ina ia to'a i le filemu o le Atua, e le fa'agateteina ai pe luluina fa'avae o le lalolagi

Iulai 8

Tusi Faitau: Mataio 5: 1-7

Matua: f.9 - *“Amuia e fa'atupuina le filemu, auā e ta'ua i latou o atali'i o le Atua.”*

AUTU: “**VALA'AUINA E MOLIMAU I LE FILEMU**”

Tatalo Fa'afetai:

- I lona fa'aaogaina o o tatou tagata fa'atauavaa ma ave fe'au o le filemu
- Ona o le fa'amanatu mai pea, o le filemu o le meaalofa a le Agaga Paia e maua ai le fesootaiga lelei o tagata i totonu o aiga, nuu ma ekalesia
- Ona o lau upu ola e aumai ai pea le to'afimalie i le loto ma maua ai le nofo lelei o ona tagata

Tatalo Fa'atoesega:

- Ua le mafai ona atagia i lana Ekalesia le feau o le filemu
- Ua le mafai ona tatou tautala i upu e tupu ai le filemu, a o upu ua fa'atupu ai le fevaevaea'i ma le fefulituaa'i
- Ua vaivai lana Ekalesia e tutū malosi ma finau atu i mea ua fai ma fa'atupu vevesi i totonu o aiga, nuu ma le atunuu, pei o fualaau fa'asaina, le 'aisa ma le 'ava oona

Tatalo Mana'oga:

- Avea lana Ekalesia ma savali o le filemu e fa'atupuina ai le fesootaiga lelei o ona tagata i taimi uma ma aso uma
- Ia a'oa'oina pea le feau o le filemu, ia le gata i totonu o tapuaiga ma fale tapua'i, a ia fa'apea foi i totonu o aiga
- Ia fa'asaga mai pea ona fofoga i lana Ekalesia ma foa'i mai lona filemu i la tatou folauga i le totonugalemu o lenei tausaga

Iulai 15

Tusi Faitau: Neemia 8: 9-12

Matua: f.10 - *“...auā o le fiafia i le Alii - o lo tatou malosi lea”*

AUTU: “**OLIOLI I LE ALII, O LO TATOU MALOSI LEA**”

Tatalo Fa'afetai:

- I lona Agaga e aumaia pea le fiafia loloto i lana Ekalesia fa'atuatua, e fa'a-fouina ai pea le malosi e fa'asaga a'e ai pea i mauga i le tatalo
- I lona mafutaina pea o le Ekalesia ma ona tagata i taimi uma, aemaise o taimi e lē taugalemu ai le folauga, e fa'atupu fiafia pea lona Agaga i le Ekalesia ma ona tagata

- I le noataga o le ‘au fa’atuatua e fefa’amalosia’i ma tatalo fa’atasi ai, e fa’aosofia ai le olioli loloto e saili ai i le Atua e ou le malosi uma lava

Tatalo Fa’atoesega:

- E le galo i le Ekalesia ma ona tagata, o le olioli e maua ma aumai e le Alii, ae pagā lea, ua saili ma fa’aaogaina le tamāoaiga ma mea o le lalolagi nei, e saili ai le olioli i le loto
- Ua sesē le fa’amuumua a le Ekalesia i le tulaga o le fiafia i lea aso ma lea aso. Ua sola le fiafia e saili ma mafuta atu i i le Atua i le tatalo
- Ua ta’ita’iina tagata i fiafiaga o le lalolagi nei e ala i fualaau fa’asaina, o tu’inauga o le tino ma isi mea fa’afiafia, ua vaivai ai le fa’atinoina o tiute ma le misiona a le Ekalesia ma le mafutaga tatalo

Tatalo Mana’oga:

- I Lona Agaga e fa’aosofia ai pea le olioli i lana Ekalesia e fa’asaga a’e pea i mauga i le tatalo e oo mai ai le fesoasoani i lea aso ma le aso
- Ole atu i le Atua le puna o le olioli, e utufia pea lo tatou gaogao i le fiafia o lona Agaga e maua ai pea le malosi fa’afouina
- Lona Agaga e fesoasoani i matua ina ia a’oa’oina pea fanau, o le fiafia moni mai le Alii, e malolosi ai fa’a-le-agaga e tineia fa’aosoosoga uma e leaga ai

Iulai 22

Tusi Faitau: II Tupu 6: 8-23

Matua: f.16 – “*Ona tali atu lea o ia, ‘aua e te fefe, auā e to’atele ua ia te i tatou, i e ua ia te i latou*”

AUTU: “**FESOASOANI MAI, UA SI’OMIA I MATOU**”

Tatalo Fa’afetai:

- I le Atua, ua fai o Ia ma fesoasoani i taimi uma o lo tatou puapuaga
- I le fesoasoani o le Agaga Paia, e auina mai e le Tamā i lo’u igoa, o a Iesu lea
- I le Atua ona o lana Ekalesia, ua avea ma fa’apopotoga o tagata kerisiano, e ala mai ai le fesoasoani a lo tatou Atua

Tatalo Fa’atoesega:

- Ua vaivai le Ekalesia i lana misiona o le mafuta ma fesoasoania’i
- Ua le afua atu i le Ekalesia le fesoasoani, a o le tutuli tagata e ala i uiga fa’aalia o lea aso ma lea aso. Ua le avea i tatou matua ma e si’omia ai le aiga aemaise fanau mo lo latou saogalemu i lenei olaga faigata ua iai

Tatalo Mana’oga:

- Fa’afouina pea e lona mana le soifua fesoota’i o lana ekalesia, e ‘a’apa atu ma fusi mai lē ua mafatia ma vaivai

- Ia maua pea e le Ekalesia ma ona tagata fa'atuatua le loto tele o loo soifua le Atua, o lona alofa e lava lea ma totoo e fesoasoani i lo tatou vaivai
- A ou vaivai ona ou malosi ai lea, auā ua ou mautinoa o lo'u Atua e lagolago mai pea e lē aunoa

Iulai 29

Tusi Faitau: Ieremia 18:1-6

Matua: f.6 - *“Le aiga o Isaraelu e, ou te le mafaia ea ona fai ia te outou e pei o lena fai ipu omea? Fa'auta, le aiga o Isaraelu e, e pei o le 'omea i le lima o le fai ipu 'omea, e fa'apea foi outou i lo'u lima.”*

AUTU: “A'AO TOE FA'AFOUINA O LE ATUA”

Tatalo Fa'afetai:

- O ona lava 'a'ao fai vavega o loo fa'afouina ai pea le soifua o le Ekalesia i le tino, mafaufau ma le loto
- O 'a'ao agalelei o Iesu e galue mo oe ma a'u, fa'amalōlō i tiga ma ma'i ma fa'amanuia i tagata
- Ona o lona alofa tunoa e galue mai ai pea ma fa'aaogaina lo tatou fa'atau-vaa, e fai ma ona 'a'ao alofa, e aapa atu ai pea e fesoasoani ma lagolago i e ua mafatia ma vaivai

Tatalo Fa'atoesea:

- Fa'atoese i le Atua auā ua avea o tatou lima ma lima o taua ma misa, a ua le avea ma lima fa'amanuia e fesoasoani ma lavea'i
- Fa'atoese i le Atua, auā o ona 'a'ao e galue mai i mea e manuia ai, a o tatou lima ua malolosi i le faia o mea ua le tusa ai ma le finagalo o le Atua
- O ou 'a'ao ma o'u lima, e fai ai galuega lelei ma le alofa, peita'i, ua fai ma lima e lepetia ai, a ua le atia'e ai. Fa'amagalo le Atua i ai tatou ma o tatou lima ua le fatufatua'i ai, a ua faia ai mea e malaia ai

Tatalo Mana'oga:

- Ia fa'amanuia le Ekalesia ma lana galuega foafoa ma le fatufatua'i. Ia atia'e ai mea e lelei ma viia ai pea le Atua ma manuia ai
- Fesoasoani ma fa'amalosia 'a'ao ta'ita'i o matua i totonu o aiga, ina ia fatufatua'i pea le olaga manuia mo aiga aemaise fanau
- Fa'amanuia le Atua i le Ekalesia ma lana misiona o le aapa atu ma aumai, ae le o le aapa atu e teena ma tutuli atu e o....

Aukuso 5, 2023

Tusi Faitau: Isaia 26: 1-9

Matua: f.3 - *“E te leoleoina ia fifilemu lava le ua mausali lona loto; auā ua ia fa'atuatua ia te oe”*

AUTU: “FILEMU UA ATOATO”

Tatalo Fa’afetai:

- Fa’afetai i le Atua, o Lē ua taula ai pea lo tatou fa’atuatua ma le fa’amoemoe i taimi uma o lo tatou ola, aemaise i taimi e lē taugalemū ai. E aumai pea e le Atua o le filemu le fa’amoemoe pe a o tatou fa’atuatua pea ma talitonu ia te Ia
- Fa’afetai i le Atua, i lona Agaga e auai mai pea ma i tatou e maua ai le filemu loloto i taimi uma o lo tatou ola
- Fa’afetai i le Atua ia Iesu Keriso o lona alo e to’atasi, o le Alii ia o le filemu na aumaia le fa’ata’ita’iga sili o le ola e maua ia te ia

Tatalo Fa’atoesega:

- I le Atua, ona o le loto atuatuva e fa’aalia pea i o tatou tagata i taimi e fesouaina ai le folauga
- Fa’atoese auā ua fa’aalia pea i le soifua o lana Ekalesia le vevesi ma le lē to’amalie i taimi e lugaluta ai le folauga
- Fa’atoese i le Atua ina ua le atagia iai tatou ua ta’ua o kerisiano ma tagata o le ekalesia, le filemu atoatoa pei ona finagalo ai le Alii

Tatalo Mana’oga:

- Ole atu i le Atua, e aumai pea lona filemu atoatoa e ala i lona Agaga e pulea ai ma fa’atonutonu folau i lo tatou ola taumafai
- Ole atu i le Atua e foa’i mai lona Agaga e ffilemu ai lana Ekalesia ma vaavaai atu pea ia te Ia e ola ma manuia ai
- Ia pule le filemu mai le Atua i o tatou loto uma lava.

Aokuso 12

Tusi Faitau: Kolose 1:9-13

Matua: f.11 - *“Ia fa’amalosi outou i le malosi uma lava, e tusa ma lona malosi ua silisili, e i’u i le onosa’i uma lava ma le fa’atoatoa, atoa ma le fiafia”*

AUTU: **“TULILOA LE FILEMU I LO TATOU OLA”**

Tatalo Fa’afetai:

- Ona o le galuega a lona Agaga Paia e fa’aatoatoa mai pea i lo tatou vaivai
- Ona o le soifua fesoota’i o lana Ekalesia e fefa’amafanafanaa’i ma fesoasoania’i e tupu ai pea le fiafia o lana fanau
- Ona o le taulaga o le leleiga i le toto o Iesu Keriso lona alo e to’atasi, ua aumai ai le leleiga ma le nonofo fa’atasi o lana fanau

Tatalo Fa’atoesega:

- Ua leai se galuega o le leleiga ma se galuea’ina o le filemu i totonu o lana Ekalesia

- Ona ua le afua atu ia i tatou o le Ekalesia le galuea'ina o le filemu i loto o ona tagata
- Ona ua vaivai e a'oa'oina ma galuea'ina le filemu o le Alii i loto o aiga aemaise fanau

Tatalo Mana'oga:

- Ole atu i le Atua e fesoasoani mai pea lona Agaga e galuea'ina le filemu i totonu o lana Ekalesia
- Ole atu i le Atua i lona Agaga e fesoasoani pea ma fa'aaupagaina matua auā le galueaina o le filemu i totonu o aiga, aemaise o fanau ia fa'atupuina pea le filemu
- Ia alu ma le mana pea le tala'iga a lana Ekalesia, ia fa'asaga pea tagata e galuea'ina le filemu e tupu ai le fealofani o le 'au uso

Aokuso 19

Tusi Faitau: Mataio 5:1-11

Matua: f.9 - *“Amuia e fa'atupuina le filemu auā e ta'ua i latou o atalii o le Atua”*

AUTU: “NOATAGA O LE FILEMU I LE VA O USO”

Tatalo Fa'afetai:

- Fa'afetai i le Atua i le loto fou ma le loto sa'o e puna mai pea i lona Agaga, e tupu ai le filemu i o tatou loto
- Fa'afetai i le Atua i lana upu moni e aumai ai pea le fa'amanatu
- Fa'afetai i le Atua i le meaalofa o lona Agaga Paia o le filemu, ua aumai ai le mafanafana o le fesootaiga o le 'au uso kerisiano

Tatalo Fa'atoeseaga:

- I le Atua ina ua leai se filemu i le loto, ua leai ai se fesoota'iga lelei pei ona finagalo ai le Alii iai tatou
- I le Atua, ina ua le avea i tatou ma fanau o lona malo auā ua fai i tatou ma fa'atupu vevesi i totonu o aiga ma fa'apotopotoga fo'i tatou te auai
- I le Atua ua vaivai le sootaga o le 'au uso i totonu o le ekalesia fa'apea aiga, ina ua leai se filemu e pulea o tatou loto mafuta

Tatalo Mana'oga:

- Ole atu i le Atua e fa'atupuina pea e lona Agaga le filemu i lana Ekalesia e mau ai pea le sootaga o le au uso
- Ole atu i le Atua ia malosi le noataga o le fa'atuatua i le 'au uso kerisiano, e tumau ai le mafutaga o le 'au fa'atuatua
- Ole atu i le Atua e fa'atupuina pea le filemu i loto o aiga e mausali ai le sootaga i totonu o aiga, le atunuu aemaise le Ekalesia

Aokuso 26

Tusi Faitau: Ioane 14:25-27

Matua: f.27 - *“Ou te tuuina atu ia te outou le manuia; o lo’u manuia ou te avatu ai ia te outou; ou te le avatu ia te outou fa’apei ona avatu e le lalolagi. ‘Aua le atuatuvaletou loto, ‘aua fo’i tou te mata-ta’u”*

AUTU: **“FAI MA AVE FE’AU O LE FILEMU O LE ALII”**

Tatalo Fa’afetai:

- Ona o lana folafolaga o le alofa tunoa, e foa’iina mai pea ia te i tatou lona manuia ma lona filemu
- Ona o lona manuia ma lona filemu lea o loo fa’atonutonu folau pea i la tatou folauga aga atu i le i’uga o lenei fo’i tausaga
- I lona Agaga auina mai, auā o lona Agaga o iai le manuia tatou te manumalo uma ai

Tatalo Fa’atoesega:

- Ina ua fai i ta’ua ma mea e tausuai ai lana talalelei ma lē maua ai se nofo lelei i totonu o ‘aulotu, aemaise totonu o aiga
- Ina ua tatou valetuulima lana meaalofa o le filemu ma le manuia ua toina mai mo i tatou
- Ina ua le avea i tatou ma fa’amanuiaga i nisi e ala i le manuia ma le filemu ofoina atu fa’apea ona fa’amanuia mai ai le Atua iai tatou

Tatalo Mana’oga:

- Ole atu i le Atua e fa’amanuia mai pea ma aumai lona filemu e ta’ita’iina ai la tatou folauga aga atu i le fa’ai’uga o lenei tausaga
- Ole atu i le Atua i lona Agaga e fa’amalosia pea lana Ekalesia e fai ma fa’amanuiaga i e ua vaivai ma tigaina. Ia afua atu i le ekalesia le fai ma puna e tafe atu ai fa’amanuiaga o le filemu ma le manuia o le Atua mo ona tagata
- Ole atu i le Atua, ia fa’amanuia mai pea i o tatou aiga ina ia afua atu ai le manuia o le filemu e olioli ai ma auauna ai pea i le Atua e le aunoa

Setema 2, 2023

Tusi Faitau: Iakopo 3:1-12

Matua: f.6 - *“O le laulaufaiva o le afi lea. O le laulaufaiva o le fa’apu’ega lea o amio leaga o le tino uma, ua fa’amuina ai le olaga nei uma lava; ua fa’amuina fo’i lenei mai Kena”*

AUTU: **“LAULAUFAIVA MO LE TALALELEI AE LE O LE MASEI”**

O apoapoaga e paepae lelei ai taualumaga o le galuega. Ae o se tu’ualalo e fai ma lu’itau i le ‘aufaigaluega. Le ala lea o upu tuusa’o a le aposetolo o loo taotoo i le amataga o le mataupu. O upu se’i fa’amanatu, ma se’i toe polili ai le

soifua fa'ale-agaga o le au fa'atuatua, i le fa'apogai e tutupu ai fa'afitauli i faiva ma tiute o le a'oa'o atu. O le taofiga a nisi, o le tu'ualalo fa'alaua'itele mo faiaoga, ma e o loo fia avea ma faiaoga o le upu. Peita'i, i nisi taofiga, e le o faia'oga o le upu lea e fautua iai le aposetolo, ae foliga mai o loo apoapoa'i iai latou o e o loo fia avea ma faiaoga o le talalelei.

O ituaiga faufauga ia lea e afua ai ona fautua le aposetolo i le 'au fa'atuatua, ina ia mata'itū i le mata'utia o le laulaufaiva e ono fa'atupula'ia ai faufauga leaga e ono tautala ai le tagata i le fa'asausili ma le fa'amaua'uga e ono tafili saunoa ai nisi i le ola, ma tauaso ai le vaai i le va ma isi ona ua fa'aaoga le laulaufaiva e fai ma auupega. Peita'i, e le o le laulaufaiva le pogai, a'o le loto. A o i ai i faigata o le ola, a lē lelei ona pulea le loto ona fai lea o le laulaufaiva ma afi e fa'amuina atili ai. Ae a tonu ona fuafua ma fa'autauta manatu o le loto, ona lua'i mai lea e le laulaufaiva tala lelei e ola ai agaga.

Fesili e fa'atupu manatu i lau tatalo:

- Aisea e faigata ai i le tagata ona taofiofi ma pulea le laulaufaiva?

Tatalo:

Tatalo i le Atua ina ia tonu ma atoatoa upu mai o tatou gutu e tala'i ai le talalelei ina ia tele ni agaga e fa'asaoina ai, Amene

Setema 9

Tusi Faitau: Neemia 4:7-14

Matua: f.10 – *“Ua itiiti le malosi o e ave avega, ma ua tele le otaota, tatou te le lavā ai ona ati le pa.”*

AUTU: **“AUA LE FA'AVAIVAI I LE FEAU O LE TALALELEI”**

O le tala ia Neemia ma le galuega o le toe fausia o pa o Ieruselema, o loo ta'ua mai ai nisi mafuaga o le fa'avaivaia o I tatou a o feagai ma galuega ua tofia ma valaauina ai, e pei o nisi nei: o le lē lavā. Fai mai tagata o Iuta, ua itiiti le malosi e amo ai avega. O lona uiga ua saga galulue pea ua i'u ai ina itiiti ma tauau ina leai se malosi i le tino ma le mafaufau, aafia atu ai ma le loto. O nisi taimi e fa'asesēina i tatou i le manatu o le 'fa'avaivai' ua na o se mataupu fa'ale-agaga. E fa'apea ifo, 'Mata e mana'omia le toe fa'asaga o lo'u ola fa'ale-agaga i le Atua'. E ao ina fa'aeteete, auā a ulufale mai le vaivai, e ulufafo le fa'atuatua!

Sa feagai sa Iutā ma le fausia o le pa e fou, ae o loo paepae otaota o le pa tuai. Ma, ina ua latou vaaia nei otaota ona latou fa'avaivai ai lea ma lē fa'asaga tonu i le galuega. Ua tele le otaota i totonu o le olaga ua le mautonu ai pe fa'apefea ona fausia le soifuaga moni. Soo se galuega fou e fia fai, e iai otaota tuai e ao ona aveese muamua auā e fai ma fa'alavelave. O mea e le maalofia, ae mafai ona a'oa'o ina i tatou i le mea e fai iai ina ia 'aua le lafoa'iina le fa'amoemoe autū. O le toilalo/faiaina – pei ona atagia i le fa'asea a Iuta, 'tatou te lē lavā ona ati le pa'. O nisi e toilalo lava e le'i amata, e le'i taumafai, a o nisi e fai lava ma le to'ilalo. Mo Iuta, e ui ina e le'i o gatasi le futia ma le umele, ae sa fa'aamalolosi

pea. O le eseesea o tagata faiaina ma tagata manumalo, o e manumalo e vaai i le to'ilalo o se mea lē tumau, ua na o se auala e saga tauivi atili ai ma e vaavaai i luma atu o le taimi nei.

Fesili e fa'atupu manatu i lau tatalo:

- Ua afua aisea ona fa'avaivaigofie le 'aufaigaluega ma le tele o 'aulotu o la tatou ekalesia i le feau o le talalelei?

Setema 16

Tusi Faitau: Esoto 31:12-18

Matua: f.13 – *“Tou te tausi lava i o’u sapati, auā ole fa’ailoga lea ia te a’u ma outou, e oo ia outou tupulaga amulī, ina ia iloa ai, o a’u nei o le Alii, o lē fa’apaiaina outou”*

AUTU: **“TAUSI FEAGAIGA MA LE ALII”**

O le fa'amanatu a le Alii ia Mose a'o i luga o le mauga o Sinai. Ia e fai atu i le fanauga a Isaraelu, ia fa'apea atu iai, tou te tausi lava i o'u sapati, auā o le fa'ailoga lea ia te a'u ma outou, e oo ia outou tupulaga amuli, ina ia iloa ai, o a'u nei o le Alii, o lē fa'apaiaina outou. Le Atua ua aapa mai ina ia lava tapena ma iloa e le Isaraelu le mana o le Atua. Ia iloa le mamalu o le Atua ma ia ola fa'apaiaina le tagata e ala lea i le tausiaina o ana tulafono ma poloaiga ua tuuina mai.

Ae o le fa'afitauli tele lea e tupu i le nu'u o Isaraelu, i le vaitaimi o le Esoto. E le o i luma, ae fa'atitifa solo i autafa ma tua. Ua leai se soifua tapua'i ma fa'alagolago i le Atua. Ua le manatua le agalelei ma le alofa o le Alii, a ua fa'atalalē ma fa'apalapala. O le sootaga o le Atua ma le tagata, ua fa'amanatuina mai e le Sapati e ala i le tagata ina ia tausi vaatele i le va ma le Atua soifua.

Fesili e fa'atupu manatu i lau tatalo:

- Ua fa'atuatua'ni o le a, e le tagata lona fa'asinomaga e ala i le fa'amanatuina o le Sapati paia o le Alii?

Tatalo:

Le Atua le Tamā paia e, ia matou iloa ona tausi ma famamalu le sapati ina ia matou iloa ai pea lou matagofie ma matou tausi ai pea au poloaiga, Amene.

Setema 23

Tusi Faitau: Efeso 3: 1-7

Matua: f.10 – *“Ia avea nuu ese ma suli faatasi ma tino e tasi ma ia tofusia fa'atasi i Lana sa folafola mai ona o Keriso Iesu i le talalelei”*

AUTU: **“O LE FAAOLATAGA MO TAGATA UMA”**

Ia avea nuu ese ma suli fa'atasi ma tino e tasi ma ia tofusia faatasi, o loo atagia ai iina le naunautaiga a le apusetolo ina ia tasi le loto, tasi le fatu e fau-

sia ai se famoemoe, ae talitonu o le sololelei lena, ma le ola lelei o le feau tala'i i totonu o tagata Efeso e pei ona folafola mai ona o Keriso i le talalelei. Le uiga lena o upu apoapoa'i a le Aposetolo mo le Ekalesia i Efeso, o loo apoapoa'i le aposetolo i uiga ma amio e tatau ona ola ai le tagata i totonu o Efeso auā o le talalelei e mo tagata uma.

O Efeso o le tasi lea o aai o loo gasolo atu iai le mau tala'iga fou, e ono tupu ai le faasesēina o le ola talitonu ma le faatuatua i le Atua soifua. Lea la o loo apoapoa'i le aposetolo, i amio e tatau ona ola ai le tagata ua moni lona iloa o le Atua, le tagata ua maua'a ma mausali lona faamoemoe ma lona talito-nuga i le Atua. Le fatu lena o le galuega tala'i lea o loo gafa pea ma le apose-tolo, le talitonu ma le faatuatua ia Iesu Keriso, o ia lea ua tasi iai le faatuatua o kerisiano uma. Le meaalofo foa'i fua a le Atua mo le lalolagi, le faamaoni ma le amiotonu lena a le Atua, a'o lona finagalo fai to'atasi lena. A'o le nau-nautaiga lena o le aposetolo, ina ia tasi lava le Atua e auaua ma tapua'i iai tagata uma ua ta'ua o kerisiano. O le ata manino fo'i lena e iloa ai le kerisiano ua moni lona ofoina atu atoa mo le Atua ma lona finagalo.

Fesili e fa'atupu manatu i lau tatalo:

- Aisea ua tosina gofie ai tupulaga talavou i le tele o tala'iga fou ua mapuna mai i nei vaitau?
- O le a se fofo e tatau ona tatou faia ina ia tineia ai lenei ma'i ua pipisi?

Tatalo:

Le Atua alofa e, ia e faasino i o matou loto ma agaga lou lava malamalama ina ia matou maua le tasi i lau afio, e auaua ai ma le faamaoni, Amene.

Setema 30

Tusi Faitau: Filipi 3: 1-11

Matua: f.1 – “O le toe manatu lenei, o'u uso e, ia outou olioli i le Alii...”

AUTU: “IA TAPUA'I FIAFIA I LE ALII”

O le tōfā mamao a le tusi lenei o Filipi ia Iesu Keriso, o lo tatou olioli, o se mataupu tu totonu lea i le tusi lenei a Paulo. A tatou auiliili ma le toto'a i lenei tusi ma fa'aupuga o loo fa'aaogaina e le aposetolo, e foliga mai o loo tusia e Paulo le tusi i se agaga fiafia ma se agaga fa'amalieina. O loo fa'aaogaina e Paulo fa'aupuga e pei, “ou uso ia outou olioli i le Alii...” Lea o loo i le mataupu e 3, ua viia e Paulo le ekalesia i Filipi e le gata i lo latou fa'atuatua ma le lototetele, a o le agalelei ma le lima foa'i ma le ola galulue o ona tagata. Fai-gofie po o le faigata, e le solomuli. Ua iloa le Atua i le loto fa'atuatua. Ua suamalie tiga ona o le fa'atuatua. Ua faigofie mea uma ona o Keriso. Ua māmā fa'afitauli ona o le olioli i le Alii. Lagona o loo ataata mai ai se mafutaga vāvā lalata o le aposetolo ma le Ekalesia.

Peita'i, o le faafitauli lea e feagai ma le Ekalesia i Filipi, e pei ona moli-mauina e Paulo i le mataupu e 3, o le tala'iga ma faa'oa'oga sesē e faasagatau

atu ai i le Tala Lelei ia Iesu Keriso. Sa fautuaina e le aposetolo le Ekalesia e ao ona tetee malosi atu i a’oa’oga sesē ma nei tagata tau faaleaga, aemaise o lo latou fa’asagatau i le satauro o Keriso.

Fesili e fa’atupu manatu i lau tatalo:

- Ua mou ese o le a le olioli o tagata e tapua’i ma auauna i le Atua?
- Pe le o le taugata ea o le soifuaga, o le faamata’u mai pea o faama’i ma le oti, poo tatou tu ma aga ua mou ese ai le olioli i nei ona aso?

Tatalo:

Le Atua mamana e, ia faatumauina i o matou loto le ola fiafia e tapua’i ma auauna i lau Afio e le aunoa, Amene.

Oketopa 7, 2023

Tusi Faitau: Mataio 17: 24-27

Matua: f.27 – “...ina alu ia oe i le vai, ma lafo se matau, o le ulua’i i’a e te maua, ia e tago iai ma fafasi lona gutu, ona e maua ai lea o le tupe siliva, ia e ave lea ma avatua ia te i latou ma oe ma a’u”

AUTU: “E TAPENAINA E IA ALA UMA”

Vavega a le Alii Faaola o Iesu Keriso, le tupe siliva oi le gutu o le i’a e fai a la’ua lafoga ma Peteru i tagata Roma. Auala ofoofogia e tapenaina e le atali’i o le tagata auā ua na o ia ua na faia ia mea, o lona mamalu ma lona silisiliese lea ua faaali e ala i tupe e maua mai i le gutu o le i’a. A o a’oa’oga a Iesu ina ia maua le nofo filemu ma le fealofani o tagata e ala i le usita’i i tulafono a le malo, ina ia lava le faatuatua o le tagata i le Atua na te tapenaina auala e maua mai ai le fesoasoani i taimi e mana’omia ai. A’oa’oga a Iesu ina ia iloa e le tagata e mulimuli ma faatuatua ia te ia. E maua lona tau i le malo o i le lagi. Ia mau lou toovae i le Atua soifua, ia taula’i la tatou vaai ia Iesu Keriso ma ana a’oa’oga, ina ia tatou gafatia ai le lalolagi ma ana aga. O le faamalosi mo i tatou, e le tuulafoa’iina e le Atua i tatou, e tapenaina e le Atua auala uma mo le tagata e maulalo, ia tatou faatuatua i le Atua ma le loto atoa auā o loo i le lagi lo tatou tau, ona manuia lea o le atunuu, nuu, aiga ma Ekalesia, auā o le alofa lena o le Atua e tumau e faavavau, e ala ia Keriso Iesu.

Fesili e fa’atupu manatu i lau tatalo:

- Ua faatalitonugatā o le a, tagata i le Atua ma lana faaolataga, auā ua uma ona ia tapenaina le ala ina ia le fano se tasi e faatuatua ia te ia?

Tatalo:

Lo matou Tamā paia e, ia totō pea i o matou loto ma fatu lo matou talitonuga ua uma ona e saunia ala uma mo i matou, Amene.

Oketopa 14

Tusi Faitau: Galuega 3: 1-10

Matua: f.6 – *“A ua fai atu Peteru, e leai sa’u ARIO po’o sa’u AURO, a’o le mea ua ia te a’u, ou te avatu lea ia te oe, o le suafa o Iesu Keriso o le Nasareta, ou te fai atu ai, inā savali ia..”*

AUTU: “E LILIUINA I TATOU E LONA MANA”

O le tusi o Galuega a le Au Aposetolo i le talalelei ia Iesu Keriso, ua tu’uina atu iai latou le mana ma le faamoemoe e faaaauu le galuega, ina ia malamalama le lalolagi i le matagofie o lo tatou Alii Faaola, le matagofie o le ola fou, le ola fa’ale-agaga. Lea ua faaalua e Peteru i le tagata pipili. Ua faatoga atu mo se meaalofo i le faitoto’a o le Matagofie, le masani lea o tagata mai lava i le tuputupu a’e, e saili se manuia e tausi ai le soifua ma le ola fa’ale-tino, saili se manuia mo le taimi nei. A’o le tali atu a Peteru, ua fa’amalōlōina i le suafa o Iesu Keriso, lea ua faaliliuina ai mai lona masani, i le ola fou ua ia maua, auā o le meaalofo ua tu’uina atu ia te ia. E sili i meaalofo uma lava, le meaalofo i le ola faa-kerisiano, le ola faafouina.

E le gata ina ua mafai ona savali, a’o lea ua talitonu ma faatuatua i le Alii Faaola, lea ua fiasia ma olioli i le agalelei o le Atua. Le faamanatu a le tusitala ne’i o tatou naunau i meaalofo fa’ale-tino, ne’i o tatou naunau i mea a le lalolagi, ae galo ai le meaalofo sili mo i tatou uma, le meaalofo i le ola fa’ale-agaga, le ola mautinoa, le faafouina le meaalofo e liliuina ai le tagata mai i le leaga i le lelei, mai i le vaivai i le malosi, mai i le lē mautonu i le mautinoa. O le mautinoa lena sa tigaina ai lo tatou Alii Faaola, lea sa feagai ma fita ma faigata, tu’u lona mamalu ae fai le finagalo o lona Tamā.

Fesili e fa’atupu manatu i lau tatalo:

- O ai se isi na te liliuina o tatou tagata i le ola e faavavau? Aisea e tatau ai?

Tatalo:

Le Alii e, ia tumau lou alofa i luga iai matou ma liliuina o matou tagata augavale i le malamalama o lou matagofie ma lou faolataga, Amene.

Oketopa 21

Tusi Faitau: Ieremia 31: 31-34

Matua: f.33 – *“ou te tuuina la’u tulafono ia te i latou, ma ou tusia ai i o latou loto, e fai fo’i a’u mo latou Atua, o i latou fo’i e faia mo’u nuu”*

AUTU: “POLILI LE FEAGAIGA FOU”

O le feagaiga fou, e tusia i loto o tagata e pei ona folafola e le Atua ia Ieremia. O le feagaiga tuai sa tusia ai Tulafono i papa ma’a, a o le feagaiga fou, o le a tusia ai tulafono i loto o tagata. O le loto, o le nofoaga o lagona ma filifiliga fai a le tagata. A tusia la Tulafono i le loto, e le toe agasala pe saisaitia ai ni filifiliga a le tagata e fai. O le mea fou lea o loo faia e le Atua. E le gata o le a toe faafoisia e le Atua lona nuu i Ierusalem, ae o le a toe faafoisia foi ma le feagaiga na latou osia. Faatafea le nuu ona ua latou solia le feagaiga na tusia i

papa ma'a. Ae a tusia i le loto, e le toe galo lava. O le faailoga lea o le Atua e faamaoni i ona tagata, e le faagaetia lava. Le atunuu e, e faafouina mea uma e le Atua, ina ia nofofale ana tulafono i lo'u loto, ina ia e manatua ma tumau i le Atua i aso uma.

Fesili e fa'atupu manatu i lau tatalo:

- Faapefea ona tumau tulafono ma apoapoaiga a le Atua i o tatou loto i aso uma?

Tatalo:

Lo matou Tamā o i le lagi, ia matou tausii ma le faamaoni i lau feagaiga ua uma ona a'oa'o ai i matou e matou te ola ai, Amene.

Oketopa 28

Tusi Faitau: Ioane 17: 6-19

Matua: f.15 – *“Ou te le ole atu ina ia e aveese ia te i latou i le lalolagi, a ia e tausii ia te i latou mai le o loo leaga”*

AUTU: *“LAVEA'I E LE ALII”*

O fea e aumai ai le mau o le autu e lavea'i e le Alii, e aumai i le tatalo faa-ositaulaga a Iesu, o loo aofia ai mea tāua e tele, aemaise le mamafa o ana faaupuga e uiga i lona alofa, i le fanau a le Atua, o e ua talia lona afio mai e saili ma faaola. Ua fai i latou na ma 'ai o lana galuega faaola. Ua avea ma ana pele faapitoa; o fua taualuga o lona manumalo i le oti ma le tuugamau. Lea e fai ma matua, ua faatauana le aioi a Iesu i lona Tamā, ina ia tausii, agalelei ma faamanuia ia i latou. Ua ta'ua e Iesu, o ana pele ia, e le ni o le lalolagi i latou. O i latou, e mai i le Tamā, ma e toe fo'i i le Tamā.

Peita'i, e le'i nenefu ia Iesu, e le'i faaliloina fo'i iai latou, o lo latou nofoaga i le taimi nei, o le lalolagi faigata, o tu'inaanau, sauā, agaleaga, fetaua'i, o faama'i, le lalolagi o loo malosi ai le ma'ema'eā ma le mata'utia o satani ma ana 'au. Ua sauni Iesu e tu'ua ona so'o, ae afio a'e i lona Tamā; ua afio a'e e faatali mai ana pele, o e o le faaauau pea lona soifua i le olaga tauivi ma tiga. O le feau, o le faaaliga o le mana o le Atua alofa, o le na te mafaia ona faasaoina i latou e faatuatua ia te ia, mai le o loo leaga. O le pogai lena o lona pulu-naunauina o lona Tamā, ina ia tausii, puipuia ma faasaoina i tatou mai i le o loo leaga.

Fesili e fa'atupu manatu i lau tatalo:

- O ai le tagata e alofa fua, alofa mutimutivale ai le Atua?
- O le a sa tatou sao mo le Atua ma lana fe'au tala'i i le lalolagi?

Tatalo:

Le Atua, matou te valaau atu ma le migao, ina ia faaoga o matou aso o totoe e auaina ma tautua ai le fe'au ma le galuega o le talalelei ina ia nofofale i manatu ma agaga o tagata, Amene.

Novema 4, 2023

Tusi Faitau: I Tesalonia 5: 12-22

Matua: ff. 16-18 *“Ia outou saga olioli pea lava; ia tatalo e le aunoa; ia outou faafetai i mea uma lava, aua o le finagalo lea o le Atua ia te outou, ia Keriso Iesu”*

AUTU: “FAAFETAI MAI TOTONU O FAAFITAU”

O alofa’aga a le Aposetolo o Paulo mo kerisiano o i Tesalonia. O i latou na tala’i iai e Paulo le talalelei i lana malaga lona lua. O le faamanatu a Paulo mo Tesalonia, ia faafetai i mea uma lva. E lē faigofie le avea ma tagata e muli-muli ia Iesu i lea vaitau. E mafua lea manatu leaga o loo faamalumalu le oti poo le ola sauāina o tagata e talitonu i lea tala’iga. A’o le faamanatu a Paulo e faalototele ma faalaei’au i tagata o Tesalonia i vaitau o le feagai ai ma le ola lamatia ona o le talalelei. Po’o a lava faafitauli o feagai ai, aemaise le faamata’u o le oti, “ia saga olioli pea lava, ia tatalo e lē aunoa, ma faafetai i mea uma.”

Fesili e fa’atupu manatu i lau tatalo:

- Aiseā e tāua ai le faafetai i totonu o faafitauli?
- Se a le uiga mo tagata Samoa o taotaomia lagona i totonu o aiga?
- Aiseā e tau ai i le kerisiano ona faafetai i le feagai ai ma faafitauli o le ola nei?

Tatalo:

Le Atua e, ia e faalototeleina i matou i le feagai ai ma faafitauli, matou te talitonu lava e maua lo matou malosi pe a e iai faatasi ma i matou i taimi faigata. Faafetai e lē muta lou agalelei e oo lava i taimi e feagai ai i matou ma faafitauli, ae o faafitauli e tapena ai lau fanau mo le aga’i atu i le lumana’i aemaise lou malo ua tapenaina.

Novema 11

Tusi Faitau: Luka 17: 7-10

Matua: f.9 - *“E faafetai atu ea o ia I le auauna ina ua faia mea na fai atu ai? Ai lava e leai”*

AUTU: “TAUTUA E AUNOA MA SE FAAFETAI”

O saunoaga a le Alii o Iesu Keriso mo le ola tau papalu o le au soo, aemaise ai le tapenaga o i latou mo le tala’iga o le talalelei. O lea ua faatūtū atu le folauga a Iesu ma le fuafuaga e malaga atu i Ierusalem, ae o lea lava e apoapoa’i le au soo e uiga i le ola auauna mo le Atua ma le tala’iga o le talalelei. Ae o se ata manino e mautinoa ai, o le auauna lava i le Atua, e auauna lava ma le tagata atoa e aunoa ma se faamoemoe i se tau i poo se faafetai.

Fesili e fa’atupu manatu i lau tatalo:

- O ai ea o i tatou e galulue e aunoa ma se faamoemoe i se tau i poo se faafetai?

- E tatau ea ona fa’afetaia oe e le Atua i au galuega o faia i totonu o lana ekalesia?
- O a ni auala e tautua ai mo le Atua e aunoa ma se tauai?

Tatalo:

Le Atua e, faamagalo lau fanau ona ua matou faamoemoe i se tauai poo se faafetai i lau galuega. Alofagia i matou e Lau Afio, le Matai o le galuega, a’oa’o mai le mana o lou Agaga Paia, ina ia o matou manino ma maua le loto maualalo e talia ai, o le ola auaua mo lau Afio, o mea lava ia e tatau ona matou faia, e viia ai lau Afio.

Novema 18

Tusi Faitau: Salamo 118: 1-9

Matua: f.1 – *“Vivii atu ia outou i le Alii, auā e lelei o Ia, e faavavau lava lona alofa”*

AUTU: “MANATUA LE GALUEGA ALOFA A LE ATUA”

O le Salamo 118 o loo manino ai le agaga fafetai ma le agaga vivii, ina ua faia e le Atua o mea silisili mo le fai Salamo. O upu a le tagata ua faamalieina le loto, ua ma’ona i le alofa o le Atua na lavea’iina ai o ia mai ona fili. O le faamoemoe maualuga i le fai Salamo, ia vivii tagata uma o Isaraelu i le Atua, auā e talitonu le fai Salamo ua tali lona mana’o na faatoga ai i le Atua i taimi o puapuaga. O le tali sili e momoli i le Atua tali mana’o, ia vivi’i i le Alii, auā e lelei o Ia, e faavavau lava lona alofa.

Fesili e fa’atupu manatu i lau tatalo:

- O tatou manatua ea le Atua ina ua tali mai i o tatou mana’o?
- E faamata o tatou taugapa i le Atua i taimi e osofa’ia ai i tatou e le fili?
- Se a le uiga o le ola vivii i le Atua pe afai e galo o Ia i taimi ma aso uma?

Tatalo:

Le Atua tali mana’o, faafetai i lou le tuuna o i matou e fano i lima o le fili. Faafetai i lou alofa ma le pule e lelei e manatua pea e le galo. Faamagalo mai lau fanau, ina ua matou faatalalē i le ola vivii i lau Afio. Le Alii e, ia e faalotootele i matou, e ala i lou Agaga Paia, e tetee ai le fili o lamatia lo matou ola.

Novema 25

Tusi Faitau: Luka 1: 46-55

Matua: ff.46-47 - *“Ona fai ane lea o Maria, ua vivii atu lo’u loto i le Alii, ua olioli fo’i lo’u agaga i le Atua lo’u faaola”*

AUTU: “FAAFETAI INA UA AMANA’IA”

O le pese na faailo ai e Maria lona agaga faafetai tele i le Atua ona o le filifilia o Ia e avea ma ala e oo mai ai le Alo o le Atua i le lalolagi. O le fili-filia

ai o Maria, o le finagalo faito'atasi o le Atua, pei fo'i ona tatou iai i lenei vaiaso, o le vaiaso o le agaga vivii ma le agaga faafetai. Faafetai ai i le Atua i le amana'ia o Maria, na ala mai ai le faaolataga na manino ai le amana'ia e le Matai Sili o tagata uma. O fatuga na lagi mai i le loto, ina ua amana'iaina e le Atua.

Fesili e fa'atupu manatu i lau tatalo:

- O le ā sau fatuga o fati e faaali ai le agaga faafetai i le Atua?
- O le ā se vaivaiga o taofia ai i tatou mai le fatu o se amio fou e fia faafofoga iai le Atua?

Tatalo:

Lo Matai Sili, faafetai i lou amana'iaina o matou tagata faatauva'a e ala i le faaolataga ia Iesu Keriso. Le Atua e, a'oa'o mai lau fanau ina ia o matou iloa ona fatu o matou olaga faa-le-Auleoleo e te fia faafofoga ma e fia silasila iai.

Tesema 2, 2023

Tusi Faitau: Kenese 9: 8-17

Matua: f. 16 - *“E iai foi le nuanua i le ao, ou te vaai foi iai, e manatua ai le feagaiga e faavavau ua osia e A'u o le Atua ma mea ola eseese uma lava ua i le lalolagi”*

AUTU: “FEAGAIGA FA'ATUMAUINA”

Ua faitau aso le tulu'iga o lenei tausaga, ae ua famanatu mai i lenei vaitau feagaiga na osia e le Atua ma le tagata. O le tasi nei o feagaiga o loo tumau pea lona moni e oo mai i aso nei. O loo vaai fo'i lava faailoga i lenei vaitau e tagata uma e ala i le nuanua. O le feagaiga na osia ma toe tagata o le lalolagi na faasaoina mai i le lolo, auā ana leai lenei feagaiga, semanū ua faamuta le iai o le tagata ola i le lalolagi nei. O se feagaiga ua talitonuina lona faamaoni, ae o se faamanatu lelei i le tagata le mataisau faatupu nuu o le Atua, e faalologo iai le foafoaga.

Fesili e fa'atupu manatu i lau tatalo:

- O tatou manatua ea feagaiga na osi e le Atua ma le tagata?
- O ai ea le tagata faatauva'a ua manatu mai ai le Atua?

Tatalo:

Ou te faafetai ia te oe le Atua, ona o lou amana'iaina o le tagata faatauva'a. Ia e faamagalo mai i matou ona ua matou loto galo i le tele o feagaiga na e osia ma le tagata. Ua matou tatalo atu le Atua e, ia tumau pea lou alofa e ala i lou tausaga feagaiga ma lau fanau nei.

Tesema 9

Tusi Faitau: Ioane 4: 1-15

Matua: f.15 - *“Ua fai mai le fafine ia te ia, le Alii e, ‘au mai ia te a’u lena vai, ina ia ou le toe fia inu, ina ia ou le toe sau fo’i iinei e utu vai”*

AUTU: “MALILIEGA”

O le feiloaiga a Iesu ma le fafine Samaria i le vaieli, na faailoa ai e le fafine o ia o le Samaria na te le mafai ona asu se vai mo Iesu o le Iutaia. Peita’i, na fofola ai e Iesu le vai o le ola na te avatu, e le toe lagona ai se galala. Le ala lea e mana’o ai le fafine i lea vai, pei ona faamamafaina i le fuaiupu o i luga. O se talanoaga na amata ma ni pa pupuni, ae na faai’u i se maliliega ma le faaolaina.

Fesili e fa’atupu manatu i lau tatalo:

- O a ni pa pupuni o taofia ai lo tatou ola tatalo i le Atua?
- O ai ea o i tatou e tatau iai le vai o le ola e pei ona aumaia e Iesu?

Tatalo:

Le Atua e, faafetai ona o le vai o le ola na ala mai ia Iesu ma ana a’oa’oga, ua matou maua ai le vai sili mo lo matou galala i la le agaga. Ia e alofa ma fa’a-magalalo lau fanau ona ua faamuamua lo matou galala i le tino, ae fa’atuai-tuai ona naunau i le vaiola mo le galala i la le agaga. Ia e a’oa’o mai i lau fanau ina ia o matou malilie e utufia lo matou galala i la le agaga i lau afioga paia.

Tesema 16

Tusi Faitau: Mataio 28: 16-20

Matua: ff.19-20 - *“O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tamā, ma le Atalii, ma le Agaga Paia; ia outou a’oa’o atu ia te i latou ia tausii i mea uma ua ou fai atu ai ia te outou; faauta foi ou te ia te outou i aso uma lava, e oo lava i le gata’aga o le lalolagi”*

AUTU: “FAI MA FA’AA’OA’O LELEI I ISI”

O le mafutaga mulimuli a Iesu ma ona soo na ia toe faamanatu ai le auaunaga a ona soo e ao ona faataunuuiina, e ala lea i le avea o i latou e fai ma faaa’oa’o o le talalelei i nuu uma lava. O se matūpalapala tōina mo le au soo ae a le faatalaleleiina o le lalolagi i a’oa’oga mai ia Iesu Keriso. E le’i tu’ua faapo-evaga e le Faola le latou mafutaga, ae na ia poipoi le ola auauna mo lana aufaigaluega. O le tala lelei fo’i e mo tagata uma, e leai se tuaoi ae ia tala’i i tagata uma lava.

Fesili e fa’atupu manatu i lau tatalo:

- O ai o fai ma faaa’oa’o lelei i totonu o le Mafutaga Aulavou, Mafutaga A’oga Aso Sa, Mafutaga Tinā, Tiakono, ma mafutaga i totonu o aiga?
- Ua e sauni ea e avea lou tagata ma faaa’oa’o i le upu moni ma le amio tatau?

Tatalo:

Le Atua e, fa'afetai ona o Iesu Keriso na ia faa'oa'o i matou i ala e tatau ona matou savavali ai. Fa'amagalo mai lau fanau ona ua faamuamua o matou tagata, ae mulia'i i lau talalelei. Alofagia e Lau Afio o matou tagata, ia fa'aaoga-ina pea lo matou ola e fai ma fa'aa'oa'o lelei tagata uma aemaise lau talalelei ia o matou ola ai.

Tesema 23

Tusi Faitau: II Samuelu 21: 1-14

Matua: f.1 - *“Ua fetalai mai le Alii, ua tupu ai ona o Saulo ma lona aiga ua toto lima, ina ua na fasiotia tagata o Kipeona”*

AUTU: “LE ATUA TAUSI FEAGAIGA”

Na tupu le oge i le nofoaiga a Tavita i tausaga e tolu, ona fesiligia lea e ia o le Atua pe faamata o se malaia ea, pe mafua i se a lenei mea. O le fetalai a le Atua na manino ai, e mafua lava ona o Saulo ina ua ia soli le feagaiga na osia e Iosua ma le nuu o Kipeona. Na soli e Saulo ina ua ia faaoo le oti i tagata Kipeona, ma o le mafuaaga lea o le oge o loo tupu nei i Isaraelu.

Atagia i lenei tala le tausi feagaiga o le Atua, e ui lava e lē lelei le auala na faia e Kipeona na ala ai ona osia lea feagaiga, ae faigata na osia lava i luma o le Atua. E ui fo'i ina ua umi tausaga, ae na manatua pea e le Atua lenei feagaiga, ma i'u ai ina tau i le ola o le fanau a Saulo.

Fesili e fa'atupu manatu i lau tatalo:

- O tatou tausi ea i a tatou feagaiga na osia i luma o le Atua?
- Se a le uiga o lenei ola pe afai tatou te soli feagaiga i totonu o aiga, nuu aemaise ekalesia?

Tatalo:

Le Atua tausi feagaiga, faafetai ona o lou manatuaina pea o feagaiga na osi i luma o lau Afio. Faamagalo mai lau fanau, ona ua matou soli feagaiga, ae ia e tapenaina i matou ia ola matata'u ma olioli i feagaiga ua osia ma lau Afio e avea ai i matou ma auuuna i lou finagalo.

Tesema 30

Tusi Faitau: Mataio 26:20-29

Matua: ff.27-28 - *“Ua tago foi o ia i le ipu, ua faafetai ona avatu ai lea e la ia te i latou, ua faapea atu, inā inu ia outou uma iai; auā o lo'u toto lenei, o le toto o le feagaiga ua faamaligiina mo tagata e to'atele e faamagalo ai agasala”*

AUTU: “FEAGAIGA FOU”

Ua tu lata i le tulu'iga o le galuega tala'i a Iesu Keriso, na ia osia ai le feagaiga fou mo tagata uma. O se feagaiga na aui i lona lava toto na fa'amaligiina mo

agasala. O lenei tausaga ua faitau itula lona tulu'iga, se a sa tatou feagiga e faia ia fou mo le Atua ma lona alofa mai, manatua ai lea o le feagiga a lo tatou faaola, o le feagaiga na aui i le ola ina ia magalo ai agasala. Avea lea feagaiga ma e fai ma molimau ola i le alofa o le Atua i la ta savaliga i lenei tausaga, o le feagaiga e galo ai le tiga o ananafi, e tapenaina ai lou tagata nei, ae a le aga'i atu i le lumana'i.

Fesili e fa'atupu manatu i lau tatalo:

- Se a ea le uiga o le feagaiga fou na fetalai ai Iesu pe afai o tatou ola pea i le olaga tuai?
- Se a sa tatou gaoioiga fou mo le tausaga fou o foufou mai?

Tatalo:

A'oa'o mai lau Afio ia o matou iloa tonu le uiga o lou alofa, e ala i le feagaiga na tapenaina i le toto o lou alo pele o Iesu Keriso, Amene.

Manuia le Tausaga Fou 2024

TAUTINOGA MAFUTAGA AU LEOLEO

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galuea'ina ai le ola fa'aleagaga o le 'au fa'atuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le fa'atuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

“Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseesega o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!”



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkasonline.org>